



UNIVERSITÄTS-
BIBLIOTHEK
PADERBORN

**Commentarius Iuridicus, Ad L. Stigmata. C. De
Fabricensibus**

Ostermann, Petrus

Coloniae Agrippinae, 1629

V. De stigmatibus materialibus violentis extrinsecis priuatis, tam vituperabilibus, quam non vituperabilibus.

[urn:nbn:de:hbz:466:1-61313](https://nbn-resolving.org/urn:nbn:de:hbz:466:1-61313)

*De Stigmatibus materialibus Violentis Extrinsicis
Priuatis tam vituperabilibus, quam
non vituperabilibus.*

Illorum vsus I. olim fuit apud Hebræos, nam si Hebræus seruiuisset sex annis Hebræo, in septimo anno liber dimitti debebatur, & in testimoniū eius auris fibula vel subula erat perforanda. *Exod. 21. v. 6. Deu. 15. v. 17.* Ex duplici causa, prima, vt proforatione illâ significaretur seruus ille isti domui obligatus, multa que deinde licet dura, & grauiā domino suo debere. Secunda, vt serui à neglectu libertatis, & Electione seruitutis detinerentur. Erat enim perforatio hæc nota vilis animi, amorem vxoris libertati præferentis, cum tamen Dominus populum suum, etiam seruos libertate donasset, ita explicat *Reuerend. Admod. D. Leonard. Marius in comment. Bib. ad d. c. Exod. 21.* Quidam hoc in penam quandam, & confusionē factum putant. *Theod. D. Thom. Abulens. Caietan. Lyranus.* vt quod voluisset vti beneficio legis, quod negat *Bonfrer. in comment. d. loc.*

Secundo hæc stigmata non solum in reliquo corpore, sed etiam in fronte & vultu vsurpata olim legimus varijs de causis: Ac in primis his ferro candente inscribebantur apud Romanos mali serui, eaque inscriptio fiebat per totam frontem, & vultum vt dignoscerentur, ab ijsque caneretur, fiebatque hæc inscriptio non modo vnica litera, sed pluribus subinde, ac integra sententia vt (Cave à fure) vel simili quos ob id stigmatias, inscriptos, literatos, vocauerunt. *Lips. Elect. lib. 2 c. 15.* Solebant & serui fugitiui apud Romanos notis antiquitus pungi, vel inuri, vt fugientes internoscerentur *l. 1. §. tamdiu 8. ff. de fugitiu. l. 2. C. de seru. fugitiu.* Tales stigmatiæ, seu subueibustæ dicebantur, subuerbustæ inquam, quasi veribus vsti, seu sub veru vstæ. *Festus Plautus. Tertull. de pallio,* libertinos in equestribus: subuerbustas in liberalibus: dedititios in ingenuis; Rupices in Urbanis: scurras in forensibus: Paganos in militaribus. *Gothof. ad d. l. 1 §. 8. ff. de seru. fugitiu.* Dicebantur etiam dedititij, qui post admissa crimina supplicij subditi, & publicè pro criminibus cæsi sunt, aut in quorum facie vel corpore, quæcunque indicia, aut igne, aut ferro impressa sunt, ita vt deleri non possint, hi, si manumissi sunt dedititij appellantur. *Gai. lib. 1 instit. tit. 1. Prate. in lexic. Iuris vocab. dedititij.* Harum notarum apud veteres inustarum meminit *Ardemid. lib. 1. Onicror. Plutarchus in Nicia* de Atheniensibus in Sicilia captis loquens (Hos vt
ser-

seruos vendiderunt, nota equi frontem innurentes) Eiusque rei meminit *Plato lib. 9. De ll.* Sic vicissim Athenienses captiuas Samiorum punctis in facie notabant, quæ noctuas referrent, teste *Aelian. lib. 2. de var. histor. cap. 9.* idque erat Atticum decretum teste eodem, in defectores latum. Hinc serui frequenter in iure nostro (stichi) appellantur. vt in *L. 16. ff. de pecul. leg. 21. ff. de fideicomm. libert. L. 12. ff. de leg. 3. l. 20. ff. de Aliment. vel Cibarij. leg. & passim.* Imo in superiori Germania ad hanc similitudinem tralatitiè, *Stricher* nuncupantur, verusque ille mos à *Geilio* ad quotidianum nostrum vsum accommodatur, quando ait, quod hodie homines proprij. *Leibeigne leuthe* (qui sunt in *Westphalia*) malitiose sæpè fugiant, & non Dominorum sæuitiã, aut intolerabili illorum imperio, vel loci sterilitate, sed potius inobedientia, & vini inopia id faciant. sicut multos vidisse se scribit ex *Sueuia*, agro frumento fertilissimo in *Austriam* vini feracissimam, & rerum omnium copia abundantem profugisse, & ibidem inter mercenarios, in popinis, & tabernis vinarijs quotidie otiose conuersatos fuisse, non necessitate, sed desidia & ignauia suã consulentes, digni, vt à præside Prouinciã, vom *Statthalter vnd Profosen* ex officio castigentur, & ignominiose etiam cum notis publicis, & stigmate. *Brandzeichen* dimittantur, vt ab alijs cognoscantur & ipsis sint exemplo, & terrori. Hæc *Geil. in Tract. de Arrest. Imper. cap. 8. n. 18. VVehnerus pract. obseru. in verb. Brandzeichen.*

Secundum exemplum refert *Plin. lib. 22. cap. 1.* Barbarorum feminas, matresque etiam: apud *Dacos*, & *Sarmatas* corpora sua inscribere, hoc est signa notasque suis corporibus imprimere, quo venustiores appareant. *Petr. Greg. Tholos. in Syntag. iur. vniuers. lib. 31. cap. 38. vnde. Herodot. ait lib. 5. post principium punctis notatas esse frontes, nobile iudicatur, non esse notatas punctis ignobile & Cicer. lib. 2. offic. & Valer. Maxim. lib. 9. cap. 13.* Barbarum compunctum notis Treicijs dixerunt.

Sicut è contrario (Quod Tertium Exemplum est) Apud *Thraeces* mulieres flagrarunt tanto odio, quod *Orpheum* discerptum à mulieribus dicerent, vt viri vxoribus stigmata inurerent in *Orphei* vltionem. *Alexan. ab Alexand. lib. 2. Genia. l. dierum cap. 14.*

Huc referri potest pro exemplo quarto, Quod in regno *Præto Ioannis*, quem alij vocant *Præsto Ioannem*, alij pretiosum, alij *Presbyterum*. *Ioannē Münster. in Cosmograph. lib. 6. cap. 56.* & masculi & feminæ circumcidantur, post circumcisionem autem masculi ad quadagesimū diem, mulieres verò ad octogesimum, nisi aliqua interuenerit ægritudo, vt opus sit festinatione, aqua & igne baptizantur insuper ipsorum frontibus stigmata inuruntur *Guilielm. Ianson in tabula Geograph. & Hydrograph.*

De Britannis *Herodian. refert lib. 3. & Isidor. lib. 19. originum. de Gelonis Solinus cap. 20. & Seruius ad illud Virgilij pictosque Gelonos, idque ferro facere solitos testis Claud. l. 1. in Rufinum.*

Membraque qui ferro gaudet pinxisse Gelonis.

De Agathyrhis idem qui *supra Solinus & Pompon. Melal. 2. cap. 1.* quos etiam ob id pictos Virgilius alibi vocat. Porro has figuras, vel literas subinde atramento fuisse impletas, vt in illis apud *Zonaram Monachis*, subinde alio colore, ad decorē, vt de Britannis *Herodianus*, de Gelonis *Solinus*, de Pictis *Isidorus* indicant. Deniq; hoc notandum, quod veritum fuerit Iudæis, causa parentis, vel amici demortui, ferro vel acuto, vel candente, corpus lædere, quod verisimile est tunc gentium moribus fuisse receptum *Leuit. 19. cap. v. 28. & ibi Iacob. Bonfrer. in comment. Biblic.* Inter prædicta stigmata seu signa, & Cicatrices hæc differentia est, quod illa vituperabilia sint regulariter, hæc verò non, iuxta *Angel. in L. Si venditor. §. 1. ff. de AEdilit Edict. & in tract. de Malefic. in §. Cicatrix*, quæ definitur, quod sit quædam scissura apparens in exteriori parte cutis: *Bald. in l. si quis in metallo. C. De Pæn.* Ex quo sequitur, quod per cicatrices & signa dicuntur homines dignosci vt in *l. 1. §. 1. ff. de fugitiu.* Ea autem duplex est, vna deformans faciem, alia non deformans vt patet ex *L. fin. ff. De his qui effud. vbi Florian.* per disiunctiuam [Aut] quæ debet poni inter diuersa. Confer. *L. 3. ff. si quadr. paup. feciss. dic. l. 17. §. 1. de vsufr.*

S E C T I O VI.

De stigmatibus supernaturalibus, materialibus extrinsecis diuinis.

HÆ signa diuiduntur, vt alia dentur, propter Securitatem, alia propter vitæ sanctitatem, alia propter vocationē. Exempla eorum quæ dantur ob securitatem sunt. primo *Genes. 4. v. 15.* Deum Caino fratricidæ signum impressisse legitur, ne à quoquam cui obuiaret, interficeretur, quod signum de tremore horribili, omniū membrorum & toruo, truculento, ac sanguinario, qualis ferè in homicidiis conspici solet, faciei vultu intelligi, quo dignotus, ille ab omnibus, fratrem suum innocentem occidisse, sicque omnibus abominabilis fuerit redditus, vt nec quisquam conuersationem eius, minus sanguinem sitiret: idque in diuturniorem Caini ipsius punitionem, aliorum vero correctionem factum esse, ex comunī vetustiorum Theologorum sententia refert *Nicolaus de Lyra in Gloss. d. cap. 4. ex D. Hieronym. & Procopio doctiss. D. Marius in comment. Bibl. qui ait, quod ille tremor non fuerit naturale signum,*